



DJÂK LI FATALISSE...  
( Èt si on s' ratakéve à Dîdèrô ? )

Dj' a comincî à d' aler mia après qu' i m' uche discôpècî in bon bokèt d' tchaûr avou s' canivèt. Dènîse mi sognéve si bén. Pus pont d' mau, pus pont d' fîve, dj' avéve ritrové l' goût d' magnî. Dj' dwarméve mi sô è riprinde dès fwâces. D' sès tote lèdjêrès mwins, èle mi kandjéve mès bindes à timps èt à eûre. I faléve voye l' sogne qu' èle purdéve po risatchî tot doûcemint l' papin èt n' pont m' fé do mau. Dj' éstéve achîd au pîd do lé; lêye, in ggno dsus l' plantchî aspouyéve mi djambe d'sus s' cwisse. A tanawète, dji m' fiéve pus pèsant èt lî mète mi mwin d'sus si spale. Djèl' riwêtéve amitiésemint èt i m' chène qu' ça lî aléve. Li rbindâdje fini, dji lî purdéve sès deûs mwins èt lî dîre dès fêls mèrcis. Dj' n' avéve nén lès îdêyes qui faléve po lî moustrer tote mi rconchance. Lêye, astampêye, lès ouy bachîs, èle mi choûtéve sins moti. A chake fîye qu' vinéve-t-à passer in vindeû d' uch à uch, dji lî achtéve ène pitite sakwè. In côp ène tchaude chabrake, l' côp d' après sakants mètes di draps po fé dès cotes, ène auréye creûjète, dès tchausses d' fén coton, in bia gros-ania, in colî d' pièles di coleûr... Après, dji n' éstéve nén



fwârt à m'n' auje po lî dner; nén d' pus qu' lêye po l' prinde. Dj' comincéve pa lî moustrer l' cayèt; ça lî chèneve-t-i bia ? dji lî dijéve : "Dènîse, c' ést po vos bistoker qui dji l' a aqwèri..." Voléve-t-èle bén l' awè ? di lî tinde m' mwin trianéve èt l' sène di tron.ner po l' prinde. In djoû qui dji n' savéve nén qwè chwèzi, dji lî a pris dès

djârtîres è dintèle di swè. Min.me qu' i gn' avéve dissu dès barbaujes di blanc, d' rodje èt d' bleûw.

Divant qu' èle n' arive, à l' pikète di djoû, dji lès a bén mètù à vûwe dsus l' tchèyêre à costé di m' lé. Ça n' a nén manqué, èle lès a vèyu èt d' dîre "O ! lès bèlès loyûres !"

- C' ést pou l' bauchèle qui dji vwè l' pus voltîye, a-dj' rèspondu.

- Avoz ène binamêye, mossieû Djâk ?

- Bén sûr, ènn'don. N' volavéve-dj' mauy dit ?

- Qui néni ! Êsse qu' èle ést avnante ?

- Tot à fait avnante èt bén djintîye.

- L' vèyoze-v' voltîye ?

- Di tote mi âme !

- Èt lêye, vos vwèt-èle voltîye ètou ?

- Dj' n' è saî rén. C'ést po lêye lès djârtîres. Min.me qu' èle m'a promètu ène sakwè qui va m' rinde sot, sî èle ni rmagne nén s' parole.

- Qwè vos-a-t-èle dont bén promètu ?

- C' ést tot bèlmint di m' lèyî lî mète iène dès deûs loyûres.

Lès massales da Dènîses sont divneûwes tote rodjes. Compurdant mau c' qui dji vinéve di lî

dîre, èle a pinsé qui dji voléve bistoker ène ôte qui lêye. S' vizâdje èst divnu tot grigneû. Èle a comincî à ranchî po trover c' qui lî faléve po m' sognî. N' vèyant nén c' qu' èle avéve dvant sès ouy, èle a fait bièstrîye dsus bièstrîyes èt sipaude pat'tavau l' vin qu' èle vinéve di m' fé tchauffer. Arivêye à m' lé, èle m' atrapa m' djambe d' ène trianante mwin, disloya tot d' truvie mèès bindâdjes èt, volant ribagnî m' scèrnache, s' rinde conte qu' èle avéve roviyî sès agayons; èle è nd' ala lès qwèri èt dj'a vèyu qu' èle ploréve. "Dènîse, dj' a dins l' idêye qui vos brèyoz, qu'avez don ?"

- Mins rén, savez.
- Èst-ce qu' ène sakî vos a fait d' èle pwin.ne ?
- Oyi-da.
- Lomoz-m' don l' wargnasse capâbe di ça ?
- C' èst vos !
- Mi ?
- Oyi-da !
- Comint èst-ce-t-i possibe ? Qu' a-dj' fait ?

Dmèrant adon moyate, èle a tapé sès ouy dsus lès djârtîres.

"Quwè ? lî di-dj', èst-ce çoula qui vos fait braîre ?

- Bén oyi !
- Adon, Dènîse, ni brèyoz pus. C' èst por vos qu' èles sont là.
- O, Mossieu Djâk, èsse po l' vrê c' qui vos m' dijoz la ?
- C' èst l' pûre vèrité. C' èst si vrêy qu' lès vola !

Dji lî a tindu lès deûs mins è z-è ractère iène. In sorîre a soûdu inte sès lârmes. Dji lî a apougî l' brès èt l' assatchî dilé l' lé, lî prinde in d' sès pîds èt l' mète dsus l' covèrte; djî lî a r'trosser sès djupons djusk'aus ggnos. Èle lès î a tinus d' sès deûs mwins Bén sèrêyes. Dj' a bètchî s' djambe èt lî passer l' djârtîre aurdêye. A pwine èstévet-èle arivêye a l' boune ôteû qui Djane, si mame, a douvièt l' uch. (...) Èle n' a nén sintu nosse èmôcion mins vèyu tot d' chûte l' loyûre qu' si fêye avéve dins sès mwins.

" Mins qu' vola ène bèle djârtîre ! è nn'd' ala t-èle, èwousse qu' èst don l' deuzyin.me ?"

- A m' djambe, lî répondit Dènîse, i m' a dit lès awè achté po s' binamêye...èt i m' a vnu qu' èles-èstîne Bén por mi. Dijoz-m', moman, pwiski dj' è nn' a mètu iène, m' fauréve-t-i nén waurder l' ôte ?
- Monsieur Djâk, Dènise n'a nén twârt; ène djârtîre ni va nén tote seûle èt n' vos vorîz nén lî rprinde c' qu' èle a. L' wazèrîz ?
- Pokwè nén don ?
- C' èst qui Dènîse ni l' voréve nén èt mi nèrén.
- On va s' arindjî. Dji m' va lî passer l' deuzyin.me divant vos.
- A qui néni ! C' n' èst én possibe !
- Adon, qu' èle mi rinde lès deûs.
- Ça n' si pout nén fé !

*(Djâk a comincî à s' diputer avou s' maîsse, si Bén qu' on n' va rén è sawè d' pus !)*

\*

TINS, SI ON S' LÈYÉVE ÈNE MIÈTE NAWÎ dins dès fulozofikès tûzèdjes ? I gn'a nén lontimps Dènant a pardoné aus-Almands d' audjoûrdu c' qui lèus tayons d' 14-18 lz-eûs avîne fait. Dji trove qui c' èst Bén. Quand dji pinse qui sakants, pou deûs ou trwès tchofes qu' leûs tayons on rascoudu dsus l' mouzon n' polenut nén sinte tot in peûpe !

Si on dmèrève avou dès vîyès rancunes, on n' îréve nén lon, asteûre qu'on fait l' Yeûrope. D' in ôte costé, i nd' a ètou qui s' sintenut rabachîs à costé do linwâdje dèl France... èt dîre qui l' walon n' a rén à vîre avou l' françès mins bran.mint avou l' tiwè ! I s' trèbukenut tofêr dins leûs idêyes : "m' aidèt a r'trover les fômes walones, dabôr ki, ôte pâ, c' est **rfrancijhi**" (cfr. ène *Èlète do 24.08.01 da LM*). Voréve sawè c' qu' on vout, *nietwôr* ? Tanawète, i faut s' sawè rècréster èt rlèver s' tièsse. Dins les "Annales 1874" do C.A.L.N. on pout lire : "la langue française n' étant que la fille du wallon" ! Si on vouréve Bén è prinde lès pwin.nes, on l' vièrève qui c' èst l' vrêy ! Mins vola, on a dès scafiotes d'vant lès ouy èt on s' trèbuke èt s' aroke todi dsus lès môdes di sicrijâdjes d' advant-ayîr èt lès sayètes d' audjourdu.